

太平寰宇記

第二十八冊

太平軍年記

卷二十八

太平寰宇記卷之一百八

江南西道六

虔州

虔州

南康郡
理贛縣

禹貢揚州之域春秋時爲吳地戰國時

屬楚秦屬九江郡漢高祖六年使灌嬰略定江南
始爲贛縣立城以防趙佗今州西南益漿溪故城
是也及封鯨布爲淮南王分江南置豫章郡贛縣
屬焉後立吳王濞時地亦屬焉故漢地理志贛縣
屬豫章郡後漢書云興平二年分豫章置廬陵郡
而贛縣屬焉又吳志云孫皓立廬陵南部此地屬

焉晉太康三年平吳改廬陵南部爲南康郡是也
東晉永和五年太守高珪置郡城于章貢二水閒
義熙七年徙于贛水東梁承聖元年復于章貢閒
卽今城是也宋爲南康國梁陳皆爲南康郡隋滅
陳改爲虔州以虔化水爲名煬帝初州廢爲南康
郡唐武德五年平江左置虔州天寶元年改爲南
康郡乾元元年復爲虔州後唐長興二年升爲昭
信軍節度皇朝因之

元領縣九

今十三

贛縣 安遠 雩都 虔化 南康 大庾 信

豐、瑞金

石城

上游

新置

龍南

新置

興國

新置

會昌

新置

州境

東西八百七十里

南北一千五十里

四至八到

東北至東京三千三百里

西北至西京三千五百一十五里

西北至長安四千一百二十五里取隨州路三千

一百四十五里

東至汀州一千二百里

東至建州隔越黃土嶺總一千八百二十里

南至循州隔越參溪石嶺總一千五百里

西至郴州一千一百里

北至吉州四百二十里

東南至潮州一千五百六十七里

西南至韶州隔大庾嶺陸路五百五十五里水路

七百六十八里

西北至吉州三百六十四里

東北至撫州一千一十里

戶

唐開元戶三萬七千六百

皇朝戶主六萬七千八百一十客一萬七千三百

三十六

風俗

同吉州

人物

唐鍾紹京

虔州贛縣人性孝小時得瓜果先進二親工書直鳳閣為苑總監從玄宗平內

難其夜拜中書侍郎至中書令

土產

鉛

砒

糖

蜜梅

竹梳箱

斑竹

石蜜

葛布

芥茶

香味第一最難得

雪瓜

桃

出冬桃山經冬始熟

五色鯉

贛縣

舊十三鄉
今六鄉

本漢舊縣也屬豫章郡吳錄地理志

屬廬陵郡晉太康地志屬南康郡因水以爲名虔
州圖經章貢二水合流爲贛其閒置邑因爲贛縣
晉太康末洪水橫流忽有大鼓隨波而下入葛姥
故城眾力齊曳蹲而不動卜于其地置縣吉遂徙
以就焉宋昇明初移置贛水東三百里梁承聖初
又遷贛水南隋平陳罷南康郡爲虔州縣西仍爲
州郭唐貞觀中徙于今理 贛水貢水首受雩都
縣之章水自南康縣界二水雙流至縣合爲贛水

從縣北一百九十二里北入吉州太和縣界黃
唐山在縣北一百六十三里輿地志云山右行六
里有石室口方八尺如數十閒屋上通天窗下有
方榻二石人巾櫛而坐傍有小石室七所相通悉
有石人室前時有車馬迹春夏草不生無諸毒蟲
林木繁茂水石幽絕蓋靈仙窟宅也山下居人每
于丙日輒聞山室有笳鼓簫樂之音鄧德明記云
有石子如彈丸聚在山角至丙日不復見他日復
有其山獨立高一千三百丈相傳以石室呼爲黃
唐廟 赤石山唐天寶六年勅改爲玉房山在縣

東南二十四里南康記云大石連聳粲若舒霞山
角多赤石有玉房瓊室耆舊相傳云宋元嘉年中
有人自稱安道士者不知何許人披服巾褐棲于
此山中數十年忽失所在其後有人時復見者

玉石山在縣北四十里其石色黑惟一片鮮白如
玉因以名焉又南康記云嘗有漁父姓瞿釣于其
下忽見二少年皎然若玉人相謂曰別此來石長
殊駛石上有冬桃樹又有石杖或云昔有人引杖
採桃子留杖今猶存焉 螺亭石山在縣東南七
十里有大石臨水號曰螺亭按南康記云昔有貧

女採螺爲業與伴侶暮宿此亭忽夜中聞風雨之
聲見眾螺張口亂噉其肉伴侶驚走貧女乃死明
旦往視之但有骨存因報其家遂殯水濱其冢化
爲巨石螺殼無數故號曰螺亭石山 覆笥山在
縣東北一百四十三里輿地志云山上有石井通
泉口廣一丈高七丈中有石笥貯玉牒云是王孝
子所留書山上有平湖湖中有石鴈耆老相傳云
秋雁銜蘆春鴻遵渚則飛鳴頡頏若候節焉 賀
蘭山在州西北隅本名文壁山卽鬱孤臺是也
伏龍山在貢水東林木陰翳 天竺山在縣西四

里唐元和初僧韜光自錢塘天竺卓錫于此故名
崆峒山古名仁空山在縣南六十里自南康蜿蜒
而來章貢二水夾以北馳山麓周迴幾百里蓋
州之望山也 西華山在縣東北一百里天寶六
載改爲靈山上有真武殿每月朔日雷火掃殿宇
天雖晴亦間有雷電 武頭山自閩發脈盤互數
十里 金精山峯頭皆石望如陣雲奇峯疊疊道
家第三十五福地中有碧虛洞初入兩崖壁立內
通一小徑至望仙峯俯視城郭邨落如綦布相傳
吳芮所鑿舊志云漢張芒女麗英入山得道長沙

王芮聞欲聘之麗英佯許昇高給曰山有石室通
洞天能鑿之當相見芮大發軍攻鑿旣通見女乘
紫雲半空語曰吾爲金精之星降治此山言訖翔
雲而去 凌雲山高數百丈蜿蜒數十里與大名
山相連石峯插峙相傳上有漢高帝祖墳 凌雲
亭在金精山漢仙女張麗英飛昇之所 上洛山
在縣南陸路九十里山中有石墨可書又按輿地
志云虔州上洛山多木客乃鬼類也形似人語亦
如人遙見分明近則藏隱能斫杉枋聚于高峻之
上與人交市以木易人刀斧交關者前置物枋下

卻走避之木客尋來取物下枋與人隨物多少甚
信直而不欺嘗就民間飲酒爲詩云酒盡君莫沽
壺傾我當發城市多囂塵還山弄明月 龔公山
在縣東北一百八十里其上奇峯翠巘前後連延
蘿木泉池左右襟帶昔有隱士龔毫棲舍于此因
以名焉 馬脊岡在縣北陸路四百里南康記云
傍山臨水形如馬脊上有臺榭遺迹云陸賈說尉
佗行次所止 秦娥峯舊傳唐時秦娥自楚來此
得道能興雲雨一曰古孝女也土人祀之山腰爲
君子嶺 竹管峒叢篁萬頃三十餘里無雜植

羅經石石上隱然具子午篆文故土人多習形家
言 洗藥池云晉葛洪鑿有偈云洞陰泠泠風佩
清清仙居永結花木長榮 貢水源出雩都縣新
樂山從東南流入縣界經州西北流八十里至縣
郭東北二十里與章水合流 章水源出大庾縣
界聶都山從南康縣東北流合西扶良熱等水流
三十里入縣郭與貢水合焉 龍翁穴在汶山觀
東二百步卽縣東二十六里昔有女道士邱氏于
此中峯松樹下白日昇仙 儲潭祠在縣北二十
里南康記云晉咸和二年刺史朱偉率兵赴江州

討蘇峻行至此山忽有神人曰余常弋釣于此百餘年帝以我司此山水府君幸能爲立祠宇當有報焉偉卽爲置廟山下江山迴洑濬而成潭故名曰儲潭君廟及至建業果有功百姓祈禱至今不絕 空山祠晉咸康五年太守庾恪于山西麓中建立神廟歷代祈雨最有靈應按郡國志云空山在郡南山多材木果實食物一郡皆資此山雖名空山其所出物百倍于他山 葛姥祠在縣東北五里輿地志云葛姥者漢末避黃巾賊出自交趾資財巨萬童僕數千于此築城爲家沒後有靈異

鄉人立祠祈禱 路嗣恭生祠在縣南三里唐大
厯九年嶺南將哥舒晃反嗣恭統五嶺兵討晃斬
晃于嶺南師之所處人不疲勞爲置生祠以顯遺
愛

安遠縣

南七百里舊三鄉今五鄉

梁大同十年置安遠縣隋開皇

中廢其後雩都縣以地僻人稀每有賦徭動逾星
歲建中三年刺史路應奏請析雩都三鄉并信豐
一里再置 九龍嶂在縣南十五里上有龍潭九
所歲旱禱雨輒應下有獅子石高百丈一石差小
亦似獅相逐 涼傘嶂在縣北八十里聳入雲表